

藝術典第四百三十七卷

醫部彙考四百十七

小兒風寒門一

唐孫思邈千金方 傷寒

論曰小兒未能冒涉霜雪乃不病傷寒也大人解脫之久傷于寒冷則不論耳然天行非節之氣其亦得之有時行疾疫之年小兒出腹便患斑者也治其時行節度故如大人法但用藥分劑少異藥小冷耳

宋錢乙小兒直訣 傷風兼變證治

傷風貪睡口中氣熱呵欠煩悶用大青膏發散之若飲冷不止而善食者用大黃丸微下之餘不可下 傷風手足冷者脾臟怯也當以益黃散溫脾胃以大青膏散風邪 傷風自利脾臟虛怯也亦用益黃散大青膏未瘥用調中丸有下證用大黃丸後服溫驚丸 傷風腹脹或作喘脾臟

虛也當先發散仍補脾

傷風兼肝則發搖煩悶兼心則驚不安兼肺則喘嗽哽氣兼脾則困睡

兼腎則目畏明各隨補其母

傷風多睡能食引飲吐瀉大便色黃此胃虛熱也當先用白朮散

以生津後用大青膏以發散

傷風吐沫瀉色青白悶亂不渴哽氣出氣腫而露睛先用益黃散

後用大青膏

傷風或涼或熱多睡氣壅大便黃白嘔乳不消不時咳嗽先用大青膏後服益黃

散慎不可下

傷風誤用下藥而作渴飲水者此胃亡津液而虛熱也多用白朮散熱渴自止

註

按大青膏乃表散之劑必外邪纏結於肺而肺氣未虧損者方可用之大黃丸乃疏利之劑其

食痰積滯於胃而胃氣尙充實者乃可施之況前證屬脾肺氣虛腠理不密外邪所乘又當臨證

制宜必以固脾胃為主若兼肢冷自利腹脹喘嗽者脾肺虛寒也六君子加木香升麻桔梗若兼

驚悸痰甚飲食少思屬心脾臟虛也四君子加芎歸酸棗仁若兼肢體倦怠喘嗽哽氣脾肺氣虛

也六君子當歸桔梗若兼目畏明白睛多腎氣虛也六味丸加五味鹿茸如未應更用補中益氣

湯加五味子乾山藥以補腎母若多睡能乳飲水吐瀉大便色黃脾氣虛而下陷也補中益氣湯

升補元氣若吐沫瀉青睡而露睛脾虛木所乘也六君子加升麻柴胡調補脾氣若乍涼乍熱喘

嗽氣壅大便黃白嘔乳不消脾肺氣虛而有邪也先用惺惺散後用四君子湯若誤用下藥而作

渴者脾胃之氣傷也用白朮散或六君子補中益氣二湯補之大凡前證若病邪急而元氣無虧者先用原方或用輕清表散之劑若元氣不足者當如前法固其元氣則外邪自退若因病久或因服剋伐之藥而未愈或更加變證者但調補脾胃諸證自愈其小兒傷風發熱鼻塞或痰壅發搐多因乳母鼻吹額門但服惺惺膏或用葱頭三五莖細切搗爛以紙寸餘攤葱在上兩掌合葱待溫貼於額門其邪卽解乃去其葱却用絹段寸餘塗以麵糊仍貼額門永無傷風之患

魯伯嗣學嬰童百問 傷寒正受傷寒夾驚

小兒傷寒初得渾身發熱無汗多啼哭看眼急有如驚風但用發散退熱莫令發渴如渴便欲飲水不飲當發散羌活散三黃散柴胡散抱龍丸或虛煩可用竹葉湯如嫩小兒當服洗心散薄荷散紅綿散四肢發汗自然精神喜悅感傷寒之重者當依仲景之法治之又有傷寒夾驚先要發散其熱乃退化痰截驚乳下嬰兒抱龍丸羌活散加荊芥防風三黃散微利痰熱次用柴胡黃芩藥調理管取向安葱白湯亦可服

小兒傷寒與時氣同異

夫小兒傷寒得之與大人無異所異治者兼驚而已又有因夾驚食而得治法與大人一同但小其分劑使藥性少差耳仲景云春氣溫而夏氣炎熱秋氣清涼冬氣冷冽此則四時正氣之序也冬時嚴寒觸冒之者乃名傷寒耳其傷於四時之氣皆能爲病冬受寒毒之氣其卽時而病者頭痛身疼肌膚熱而惡寒名曰傷寒其不卽時病者寒毒藏於肌膚之間至春夏陽氣發生則寒毒與陽氣相搏於榮衛之間其病與冬時卽病無異但因春而發名曰溫病至夏而發名曰熱病陽熱未盛爲寒所制病名爲溫陽熱已盛寒不能制病名爲熱故太醫均謂之傷寒也然熱病傷寒溫病時氣傳變無異也凡時氣者四時之間有不正之氣也如春應暖而反寒夏應熱而反冷秋應涼而反熱冬應寒而反溫非其時而有其氣氣之中人則頭疼壯熱咳嗽氣壅煩渴心躁恍忽驚悸傳變與傷寒無異故一歲之中病無長少率相似者此則時行之氣俗謂之天行是也治法三四月或有暴寒其時陽氣尙弱爲寒所折病熱猶輕升麻湯解肌湯主之五六月陽氣已盛爲寒所折病熱則重七八月陽氣已衰爲寒所折病熱亦微調中湯射干湯半夏桂甘湯可選用也秋溫冬溫治濕則利小便治冬溫亦宜解利其利小便也則以五苓散輩其解利冬溫宜葳蕤湯蓋冬溫者感溫氣而作寒疫者

暴寒折人非觸冒之過其治法不同所施寒熱溫涼之劑亦異不可拘以日數發汗吐下隨證施行要之治熱以寒溫而行之治溫以清冷而行之治寒以熱涼而行之治清以溫熱而行之以平爲期不可以過此爲大法湯氏有七寶散加減服之併與乳母尤好有熱者升麻湯加柴胡黃芩等劑治之柴胡石膏湯極效

傷寒表裏

凡治小兒傷寒須辨表裏表裏不分汗下差誤古人云桂枝下咽陽盛卽斃承氣入胃陰盛以亡傷寒有表證有裏證有半在表半在裏有表裏二證俱見然在表者宜汗在裏者宜下在半表半裏者宜和解表裏俱見隨證施治無表裏證用大柴胡湯下之其表證者發熱惡寒身體痛而脈浮無汗頭疼項強腰脊痛此足太陽膀胱經受病也宜汗之然傷寒發表當隨病輕重而汗之頭疼發熱兼驚亦只用葱白湯汗之甚則麻黃湯各半湯解肌湯葛根湯柴胡散皆可選而用之其裏證者惡熱而不惡寒手掌心并腋下澼澼汗出胃中乾咽燥糞結聚潮熱大便鞭小便如常腹滿而喘躁渴脈沉而滑內熱而譫語此屬足陽明胃經也宜下之小承氣湯大承氣湯四順飲洗心散斟酌輕重用

之其在半表半裏者心下滿口不欲食大便鞭脉沉細是裏證當下其人頭汗出微惡寒手足冷卽當汗此兩證俱見者仲景所謂半在表半在裏也小柴胡湯主之太陽病不解傳入少陽脅下鞭滿乾嘔不能入飲食往來寒熱尙未吐下診其脉弦緊者小柴胡湯主之此屬少陽膽經也宜和解其表裏兩證俱見者病人脈浮而大是表證當汗其人發熱煩渴小便赤是裏證當下是表裏證俱見五苓散主之又傷寒不大便六七日頭痛有熱者是也裏證當下其人小便清者知不在裏仍在表當須發汗此是兩證俱見卽未可下宜與桂枝湯又太陽病醫反下之因亦腹痛是有表復有裏仲景用桂枝加芍藥湯痛甚者桂枝加大黃湯或腹滿時痛尺寸脈俱浮洪者此足太陰脾經也自利不渴當溫之四逆湯理中湯其無表裏者傷寒四五日以後以至過經無表裏證又於裏證未可下者旣非下證亦非汗證皆可用小柴胡湯隨證加減用之以至十餘日外用小柴胡湯不愈者若大便鞭者可汗則用大柴胡湯下之仲景云六七日目中不了了睛不和無表裏證大便難身微熱此爲實也當下宜大承氣湯若不渴口不燥舌乾而目沉者急溫之宜四逆湯此足少陰腎經也其表熱裏寒者身大熱而反欲得衣熱在皮膚寒在骨髓也宜先與陰旦湯寒已次以小柴胡湯加桂以

溫其表又身大寒而反不欲近衣寒在皮膚熱在骨髓也宜先與白虎加人參湯熱除次以桂枝麻黃各半湯以解其外又厥陰證脈浮緩者必曩不縮外證必發熱惡寒似瘧爲欲愈宜桂枝麻黃各半湯若脈尺寸俱沉短者必曩縮毒氣入臟宜承氣湯下之厥陰病其脈微浮爲欲愈不浮爲未愈宜小建中湯此足厥陰肝經也然以表裏證內近似三陰三陽之證而疏於各證之下非可以盡備六經之大法也當以活人書傷寒論爲主其瘧證與大方治法同後有本條夏傷於暑秋必瘧瘧其暑證玉露散主之其詳亦與大方同其治法但用分劑輕耳口議有脫甲散大能除熱扶表救裏眞良方也

傷寒咳嗽傷風

仲陽云咳嗽者肺感微寒八九月間肺氣大旺病嗽者其病必實非久病也其證面赤身熱痰盛法當以葶藶丸下之若久嗽不可下也冬月嗽乃傷風咳也當以麻黃湯汗之有熱證面赤飲水涎痰濃稠咽喉不利者宜甘桔湯有肺盛者嗽而後喘面腫欲飲水有不飲水者其身卽熱以瀉白散瀉之有嗽而吐涎痰乳食者以白餅子下之然肺主氣應於皮毛肺爲五臟華蓋小兒感於風寒客於

皮膚入傷肺經微者咳嗽重者喘急肺傷於寒則嗽多痰涎喉中鳴急肺傷於暖則嗽聲不通壅滯傷於寒者必散寒邪傷於暖者必泄壅滯發散屬以甘辛卽桂枝麻黃細辛是也湧泄係以酸苦卽葶藶大黃是也更五味子烏梅之酸可以斂肺氣亦治咳嗽之要藥也久嗽不已必主驚悸頑涎血脉灌臉其嗽傳受五臟或吐逆或痰涎或厥冷或恐悸甚而至於眼目兩眶紫黑如被物傷損眼白紅赤如血謂之血眼治之之法當用生地黃及濕黑豆研成膏掩眼上而眼腫黑自消其血皆自眼泪而出眞良方也兼服麥煎散而嗽自止久嗽成癆當服散癆等劑凡治嗽先要發散寒邪然後服寬氣化痰止嗽之藥卽得痊癒先服九寶丸華蓋散葶藶丸抱龍丸或細辛五味子湯如有熱可服涼肺之藥柴胡黃芩等劑并瀉白散痰多氣喘用金星丸利痰了却服前藥後服百部丸生犀散天麻定喘飲調理而安冷證咳嗽小青龍湯加杏仁去麻黃亦可服有熱及時氣咳嗽柴胡散加杏仁五味子柴胡石膏湯亦可錢氏生犀散加減亦佳有驚咳嗽天麻防風丸治之惺惺散化風丹皆可服金沸艸散三拗湯加減及治傷風咳嗽之常劑也和解湯治四時感冒可加減服

小兒八歲以下無傷寒雖有感冒傷風鼻塞流涕發熱咳嗽以降痰為主略加微解凡散利敗毒非幼稚所宜感冒輕者不必用藥候二三日多有自愈

註

按前證若手足冷或腹脹脾虛也用六君

子湯加升麻柴胡若腹脹或氣喘肺虛也用四君子湯加柴胡升麻經云肺主氣而司皮毛肺虛則腠理不密外邪易感凡發表之後其邪既去用補脾肺以實其表庶風邪不能再入往往表散之後熱嗽不退復行發表多變壞證

徐春甫古今醫統 傷寒候

小兒傷寒與大人無異所以異者兼有夾食而已其或偶而中傷謂之時氣又與傷寒不同若小兒在襁褓中或長成而稟賦怯弱多因乳母解脫衣服不避風寒所致也然小兒患此口不能言其致病之由脉不能診其必然之理但只煩啼發熱而已故不可不盡心焉初得之時嬰幼則以虎口三關脈紋紅色驗之長而童稚則以一指按其三部據左手脉之緊盛而斷之其喘急憎寒心氣熱呵欠煩悶項急者是也其惡寒惡風必猥人藏身引衣密隱是爲表證惡熱內實者必出頭露面揚手擲足煩渴燥糞掀衣氣粗是爲裏證至若頭額冷汗手足涼口冷氣面色黑暗淡大便瀉青此爲陰

證視其小便或赤或白可以知裏熱之有無或青或濁可以知裏證之輕重舉是觀之則汗下清溫之法可類推矣

王肯堂證治準繩 小兒傷寒表裏攻發

有表證惡風惡寒者當發 海藏云惡風者白朮散惡寒者神朮湯

如氣盛能食不大便無表證者可攻裏 春主溫屬木身溫當發汗 海藏云神朮湯

夏主長屬火身熱而煩躁合大發散 海藏云神朮加黃芪湯

長夏主化屬土及居四季同當調其飲食 海藏云四君子湯

秋主收屬金身涼納溫合微下 海藏云通膈丸金花丸

冬主藏屬水身熱而惡寒是熱在外而寒在內身寒而惡熱是熱在內而寒在外 海藏云熱在內

者調胃承氣湯寒在內者調中湯丸

凡傷寒宜依四時陰陽升降逆順剛柔而施治法氣升浮則順發之收藏則下之有汗發熱惡風脈沉緩者風傷衛桂枝湯 無汗發熱惡寒不當風而自憎寒脈浮緊者寒傷榮麻黃湯 有汗

發熱惡風脈浮緊無汗發熱惡寒脈浮緩謂之榮衛俱傷青龍桂枝麻黃各半湯 無汗發熱不

惡風寒脈沉洪者可下之更詳認其厥與不厥量寒熱深淺而治之 有汗四肢厥脈沉微者名

陰厥四逆湯 無汗四肢厥脈沉微者名陽厥大承氣湯加膩粉 如四肢不厥身熱內外皆

陽不動三焦宜涼藥三五服下之黃芩甘艸湯黃芩白朮湯黃芩蒼朮湯黃芩梔子湯連翹飲子小
柴胡湯八正散涼膈散白虎湯五黃散此上中下三焦藥宜選用之 中暑脈虛背惡寒自汗而

渴者白虎湯 身涼脈緊熱在內者急下之口燥咽乾不大便是 無汗身大熱者可發汗升

麻湯大青膏天麻膏 有汗身大熱者桂枝湯惺惺散解肌湯小柴胡湯白朮防風湯可選用之

發汗者量四時暄暑燥濕風寒各宜春涼夏寒秋溫冬熱而發之

小兒衛生總微方論 傷寒論

經曰傷寒者有五有中風有熱病有溫病有中濕有傷寒其所苦各不同此五者配入五氣隨四時
爲病故春風夏熱秋濕冬寒中溫而傷寒則居一焉其細論在傷寒類證集中其四時之病皆謂之
傷寒者乃總槩之名也內熱病者乃盛暑之時炎熱之氣中人爲病也又名中暍濕病者乃雨露霜

霧烟嵐水漬濕氣中人爲病也小兒無此二病謂小兒不治家事未有幹辦早臥晚起不致衝冒故也外傷風傷寒溫病小兒有此二病謂嚴寒厲風溫氣無所不至小兒肌肉脆軟氣血柔弱易爲傷之故也是三病者其證其脈不可診切兒稍大者可切脈而別之傷風之脈陽浮而陰弱也傷寒之脈陰陽俱盛而緊濇也溫病之脈行在諸經未知何經之動隨其經之所在而取之也若嬰小未能診切者但看其形候耳

傷風者乃四時八方爲厲之風傷人其候昏睡呵欠煩悶口中氣熱或自汗惡風發熱鼻鳴乾嘔熱多寒少面光而不慘手足皆熱煩躁治當發散有飲水者有能食者有不能食者其飲水能食者可微下之餘不可下也

傷寒者乃冬時嚴寒之氣傷人入於腠理當是之時壯者氣行而已怯者則著而爲病其卽發者爲傷寒至春發者爲溫病

一云在夏至之前非時行溫氣之病

夏發者爲熱病

一云在夏至之後非中暍之熱病

其候面赤渾身壯熱頭痛體疼鼻塞聲重清涕咳嗽寒毛立氣促急或嘔吐白水寒多熱少面色慘而不舒手足指末微冷不煩躁而惡寒

傷風者不惡寒而惡風傷寒者不惡風而惡寒其惡風者

當風而乃憎寒也其惡寒者雖不當風而亦自憎寒也以此別之

治者若脈洪盛身體壯熱頭痛面赤四肢暖者爲陽證宜汗之若脈微細身冷不甚頭痛體疼面青四肢冷者爲陰證宜溫之

溫病者四時之間非節候邪氣傷人如春應溫而反寒夏應熱而反冷秋應涼而反熱冬應寒而反溫言此時通行此氣爲病無少長略同故名天行時氣又名時行溫病其候頭痛身重壯熱體疼與傷寒相似但臨時看其脈與其證以屬何經受病隨經而求之爲治也已上三病通以傷寒爲治邪在外者解之汗之邪在內者溫之下之當隨證按法而行之錢乙言傷寒男體重面黃女喘急面赤各憎寒口中氣熱呵欠煩悶項急此乃不分傷風傷寒而概言之也況傷風傷寒證候傳變多端自有專經可憑孫真人云治小兒與大人無異惟減用湯劑極少耳更有傷風寒而兼食者俗呼謂之夾食傷寒也其候壯熱煩渴鼻塞聲重四肢困倦眼黃腹中脹痛涎唾嘔逆或呵欠煩悶治者不先攻所傷但先解表候表解然後下之則病與食皆去也若不顧其表便以藥攻之多致結痞也又有因失饑而食寒飲冷傷於脾胃而中風寒其候胷膈不快腹脹而痛面色唇口皆青手足逆冷脈沉細者此寒傷於脾寢屬太陰庸工不識以爲胷膈不快妄用針灸或

便投駛藥則胃膈愈不快而吐利只一兩日間便致危殆此不明之誤非其治也所謂傷寒本經藥證甚多難以具述今採其小兒常所患者之方及有兼見之證略爲條叙傷風寒手足冷身熱面赤頭痛者此脾怯也宜先和脾然後發散傷風寒自利者脾虛也宜先補脾然後發散未差者先調順其中有下證者微下之有驚者退之 傷風腹脹而喘者脾虛也宜先補脾去脹定喘候喘定然

後發散

傷風寒得下後大熱已退而餘熱未解者是下之太過胃虛而熱乘之故也胃中虛熱

者雖是無多當生胃中津液津液得生則熱自退矣

傷風寒其熱在外者爲表病若未入於裏

兩解之夫裏虛氣逆熱結胃中堅硬而痛者此爲結胃若但硬滿而不痛者此爲痞氣若因飲水得者則爲水結若三四日外熱入於裏則腹滿痞內實有燥糞者當下之若熱入大腸則爲大便結澀不通若熱入小腸則爲小便難澀不通熱入大小腸則爲大小便不通熱入脾胃脾胃屬土候於肌肉熱盛蘊蒸於外則爲發黃熱熏於心胃則爲煩躁津液耗減者則爲發渴熱上衝咽喉口舌者則生瘡腫疼痛有血泄者血得熱則流溢妄行從鼻出者則爲衄血從口出者則吐血從大便出者則便血從小便出者則遺血若壯熱未汗躁喘鼻鳴因衄一升數合而熱得歇者病則解矣若出至二

三升者危矣若熱毒積滿於內不得時下致毒乘瘀血則煩盛發狂若燠寒昏冒悶亂者死若胃有寒氣相搏則嘔哕咳逆若肺有寒相搏則咳嗽氣急若氣怯者傳變入陰則四肢厥逆面青體冷下利清穀並當隨證施治

錢乙論傷風傷寒瘡疹傷食壯熱昏睡一皆相似若倉卒未能辨認之間但與升麻葛根湯惺惺散小柴胡湯此數藥通治甚驗

聖惠論嬰孩傷寒不可用性燥藥發

汗燥加臟腑熱極傷心則厥逆難治又不可用性熱藥熱乃助陽陽極則陰爭四肢汗出如油手足或冷或熱多致發狂顛癇搖擲爲難治又不可用性寒藥寒則陽受其冷則寒熱相擊一向叫啼不睡使熱上衝於腦則頭骨縫開爲難治予流落錢塘就館於親豪蘇伯正防禦家伯正以醫治傷寒名予常觀其用藥次第若小兒傷寒壯熱頭痛體疼脈大鼻塞聲重噎咳呵欠惡風憎寒病在表可汗者用銀白散熱多者甘露散有食飲宿滯脾胃不和者以安胃丸間服芻葷不快者以香薷散間服煩渴飲水或作寒熱者靈砂散間服有驚者天麻防風丸人參化風膏涎盛咳嗽者小珍珠丸如此施治隨手得愈者十有八九餘一二者乃病久傳深或已成變證方纔請召亦依法調治乃得痊可其所用之藥多非古方性不燥熱率皆溫平是謂曉南北之異地識寒熱之所宜深通古人治病

之大體也

董鳳翀活幼精要 傷寒

凡治傷寒須別表裏表裏不分汗下差誤表證當汗裏證當下發表攻裏不易之法表證屬陽病在六腑裏證屬陰病在五臟陽盛陰虛汗之卽死下之當愈陽虛陰盛下之卽死汗之卽愈陽虛外寒陰虛內熱陽盛外熱陰盛內寒不汗強汗津溢枯竭合汗不汗竅悶閉絕不下強下洞泄不禁合下不下腫脹悶亂犯此數者是是死證